

تاریخ عثمانی انجمنی

مجموعہ سی

ایک آبدہ برنشر اولنور

مندرجات

طوبقبو سرای مایونی (مابعد وختام) عبدالرحمن شرف
 علمدار مصطفی پاشا (مابعد) افضل الدین
 قرہمان اوغللری حقندہ و نائق محکوکہ (مابعد) خلیل ادم
 منتشا اوغللری توحید
 رمضان اوغللری ازمیت متصرفی نزهت
 ببلیو غرافیا (سرای بوسندہ ابنہ خیرہ نک مصور تاریخی)
 تفرقہ: تاریخ سلطان محمد ثانی. مؤلفی قریتو و ولوس. مترجمی قارولیدی .

فیثاتی ۵ غروش

مرجمی — باب عالی تاریخ عثمانی انجمنی

استانبول

مطبعہ عثمانیہ

مطبعہ عثمانیہ

۱۳۲۹

قرامان اوغلاری حقنده وئائق محکوکه

(۱۱ نومرولی جزؤدن مابعد)

بالاده کی ۹ نومرولی کتابده سلطان مراد خان اول کریمه سنک
اسمی محرر اولیوب یالکز (سلطان خاتون) دنیورکه الیوم قوللانیلان
(سلطان افندی) عنوانه معادل کلور . تاج التواریخده ۷۸۳ وقایعی
صیره سنده ییلدیرم بایزید خانک کریمیان اوغلی کریمه سیله اجرا اولنان
دوکونی ائشانده سلطان مراد اولک کریمه سنک دخی قرامان اوغلی علی
بکه نامزد قلندی بی محرایسه ده سلطانک اسمی بوراده دخی کوسترله مشدر [۱] .

حالبوکه فریدون بک منشآتیه درج ایلدیکی عقدنامه ده سلطانک اسمی
« نفیه » اولدیغی ییلدیریور . بوندن صکره خیرالله افندی و هاسر
وساثره بواسمی تاریخلرینه قید ایتشلردر . مذکور عقدنامه یاخود خطبه
نکاحک تاریخی بزى بعض مشکلاته دوچار ایدیور ، زیرا فریدون بکک
مطبوع نسخه سنده ۲۰ رمضان ۷۸۷ سنه سی محرر اولدینی کی مراجعت
ایلدیکمز ایکی ال یازیسی نسخه دن برنده ینه بوسنه و دیگرنده ایسه شبه لی
اوله رق ۷۸۰ سنه سی [۲] و مورخ هاسرک مأخذی اولان ال یازیسی برنسخه ده

[۱] تاج التواریخ ، جلد ۱ ، صحیفه ۹۸ — منجم باشی صحیفه ده ، جلد ۳ ،
صحیفه ۲۹۸ و ۳۰۱ ، بیوک برسهو اوله رق قرامان اوغلی علی بکک سلطان
خاتون نام کریمه سی ییلدیرم خانه تزویج ایدیلشدر دیبور .

[۲] فریدون بک ، مجموعه منشآت السلاطین ، مطبوع نسخه ، جلد ۱ ، صحیفه
۱۰۳ — نورعثمانیه کتبخانه سنده ال یازیسی ، نومرو ۴۳۱۷ ، صحیفه ۱۱۴
(حرر فی العشر الاخير من شهر رمضان المبارك سنة سبع وثمانین و سبعمایه) — ینه
اوکتبخانه ده ال یازیسی ، نومرو ۴۳۱۳ ، صحیفه ۲۱۰ ، عین کون و عین آی محرر
اولوب یالکز تاریخی (سنه وثمانین و سبعمایه) صورتنده یازیلی اولدیقتن ۷۸۶ اوله رق
اوقونیه ییله جکی کی ۷۸۰ کی دخی اوقونور ، فقط بوحالده برواو فضله در .

ینه ۷۸۰ سنه‌سی [۱] مندرجدر . نفیسه سلطانك دها قرامان اوغلیله عقدی اجرا اولمندن اول قرامانه کیدوب برمدرسه انشا ایتدیرمی متصور اولمیدندن [۲] فریدونك مجموعه‌سنده کی عقدنامه‌ك تاریخیله مستسخ خطاسی نظریله باقی و ذاتاً مورخلر هان متفقاً نفیسه سلطانك دخی نامزدلکی برابر اجرا قلنان ییلدیرم بایزید دوکونك اجرانی ۷۸۳ده قید ایتش بولندقلرندن [۳] و بوده کتابه‌ك تاریخیله توافق ایلدیرکندن بوسه‌ی مشارالیه‌ك دخی تاریخ تأهل اوله‌رق قبول ایتک مجبوریتمده یز .

فقط نفیسه سلطانك زوجی کیم ایدی ؟ تاریخیلمز اکثریا علی بك و بعضا علاءالدین بك دینوب کچورلر . کتابه‌ی او قودقدن صکره ایلک خاطره کلن شی اوراده اسمی محرر اولان علاءالدین خلیل بك نفیسه سلطان زوجی بولنش اولسیدر . انجق ایلروده محقق صورته کوریه . جکدرکه خلیل علاءالدین اسنده براوغلی بولنوب تحت قرامانی ده کندوسه خلف اولدینی ظن اولنور . تاریخلر علاءالدین مکرراً عثمانیلره قارشو اعلان حرب ایدوب مغلوب اولدینتی وزوجه‌سی سلطانك رجاسیله مظهر عفو پادشاهی بیوریلدینتی و نهایت ینه اعلان خصومت ایلسی اوزرینه ۷۹۳ده بیورتاش پاشا طرفندن طوتیلوب قتل ایدیلدیکنی سوبلیورلر . بزه قالور ایسه نفیسه سلطانك زوجی اشته بو علاءالدین بکدرکه شکاریك مضبوطاتی دخی بونی مؤید اولوب حتی بومورخ محلنده کوستریله جکی وجهله خلیلک اوغلی

[۱] هاسر ، جلد ۱ ، صفیحه ۲۶۵ .

[۲] وان برخم بورالینی واقفانه برصورته بالاده مذکور اثرنده تدقیق

ایتمشدر ، صفیحه ۱۲۲ .

[۳] عاشق پاشا تاریخی (واتیقان کتبخانه‌سنده بولنان نسخه دن تاریخ انجمنی طرفندن الدیریلان فطوغرافی سندن) سنه ۷۸۳ — نشانجی تاریخی (مطبوع) ، سنه ۷۸۳ — کلشن معارف ، جلد ۱ ، صفیحه ۴۴۵ . قرامان اوغلی دوکونی ۷۸۳ سنه‌سنده — تقویم التواریخ ، سنه ۷۸۴ — موسیوده و بیس سیاحتنامه‌سنده (صفیحه ۲۹۶) کتابه‌ك تاریخی طوغری اوله‌رق ۷۸۳ اوقومشدر :

Davis, Life in Asiatic Turkey, London, 1879.

علاءالدین بک عثمان اوغلی قیزندن متولد چو جقلرینک اسملرینی بیله
 تمدا ایدییور. بو حالد علاءالدین خلیل بک نفیسه سلطانک قان پدیری اولوق
 لازم کلور [۱]. نفیسه سلطانک مدفون بولندی محل اولوق اوزره بومدرسه
 داخلنده عالی برقه کوستریورلر. فقط درون و بیرونی اودرجه تخریب
 ایدیلشدرکه دیوار لرند بولنان چینی لردن و مزارینک مزیناتندن و کتابه سندن
 هیچ برائر قالمشدر. بناء علیه مشارالیهانک تاریخ وفاتی معلوم دکدر.
 علاءالدین خلیل بک تاریخ وفاتی ایچون دخی عین مشکلات قارشوسنده یز
 زیرا ارمناکده بنا کرده سی اولان سپاس جامنده کندی قبری اوله رق
 کوستریلن محله هیچ بر کتابه یوقدر [۲]. شکاری به نظر آخیل اون پدی سه
 حکومت ایتد کدن صکره وفات ایدرک یرینه اولا بدرالدین و صکر فخرالدین
 و بوندن صکره صیره ایله شمس الدین و موسی و سلیمان بکلر کچمشلر و بوندن
 صکره علاءالدین بک تخت نشین اولمشدر. احتمال که موسی الیهک هبسی یا خود
 بمضیلری عین زمانده حکومت ایتمشدر. هر حالده بوجهت محتاج تدقیقدر.
 فی الواقع شکاری تاریخنده مندرج اولدینی اوزره خلیلک داود و خضر و اسحاق
 و سلیمان و علاءالدین ناملریله بش اوغلی اولوب صاغلقنده آقسرائی داوده
 و ارمناکی خضره و آقشهری اسحاقه و یروب سلیمانی وزیر اوله رق یاتنده
 آلیقوبمش و علاءالدینی عکره سردار نصب ایتمشدر و قزنداشی اوغللری
 فخرالدین ایله شمس الدینه موط و لایتنی و قرامانه کلناری و یرمشدر. خلیل

[۱] وان برخم بالاده مذکور اثرنده ، صحیفه ۱۲۴ ، قرامان اوغللرینه
 دائر موجود اولان دیگر کتابه لره واقف اولدیقتن ایکنجی محمدک برادری علی
 بکی خلیلک اوغلی و نفیسه سلطانک زوجی اولوق اوزره قبول ایتک استیور.
 حالبوکه اتیده کی کتابه لردن و وئاقی سائرده دن مستبان اولدینی وجهله خلیلک اوغلی
 اولان علاءالدینک علاءالدین علی اسمیله براوغلی وارد که کتابه لری ۸۱۰ سنه سندن
 صکره یه عائددر. علاءالدین اسمی چوق کره علی اوله رق استعمال اولندیقتن
 بوندن طولای تردده حاجت قالمز.

[۲] ارمناک داخلنده غریجی قریه سنده دخی خلیل بکک برجاسی اولدینی
 خبر و بریلیور.

بکک وفاتندہ بونلرک ہریری یرلرندہ اعلان استقلال ایدرک کندولرینی قرامان تختہ مالک کی عدائتمش اولہ جقلری ونہایت علاءالدینک کسب استقلال ایلہ قرامان پادشاہی اولدینی ملحوظدر .

علاء الدین بن علاء الدین خلیل

شمدی بہ قدر طوغریدن طوغری بہ علاء الدین بک نامنہ نہ برکتاہ بہ نہدہ برسکیہ دسترس اولہ مدق . فی الواقع شکاری بہ کورہ ملوک قرامانیہ نک اعاظمندن عداولنوب ابوالفتح عنواتی دخی احراز ایلین بر حکمدارک ہیج بر وثیقہ محکوکہ سی بولنامسی موجب استغراب وختی موجودتی حقندہ بیلہ داعی شہہدر . حالبوکہ آئیدہ صیرہ سیلہ کوریلہ جکی وجہلہ ایکنجی محمدک ۸۰۵ دن ۸۲۴ تاریخنہ قدر متعدد سکہ وکتاہہ لرندہ بتون (محمد بن علاء الدین) و برادری علی بکک ۸۱۲ و ۸۱۶ تاریخلی کتاہہ لرندہ (علی بن علاء الدین) و برادری محمد بک نامنہ اولان ینہ علی بکک ۸۱۲ تاریخلی کتاہہ سندہ (علی بن علاء الدین بن خلیل الخ) و ابراہیم بکک ۸۲۷ تاریخلی کتاہہ سندہ (ابراہیم بن محمد بن علاء الدین) و ۸۵۹ تاریخلی بر وقفنامہ سندہ (ابراہیم بن محمد بن علاء الدین بن خلیل الخ) دیہ محرر اولدیندن خلیل بکک اوغلی علاء الدین بکک شخصی صورت قطعیدہ تعین ایدر .

شکاری تحریر ایلدیکی تاریخک بر قسم مہنی بو علاء الدین بکک حصر ایدوب بنی ارتنا و اطراف مغوللریلہ و سلطان مراد اوغلی سلطان یازیدایلہ اولان محارباتی و کونا کون مظفریات و فتوحاتی بر تفصیل حکایہ ایدیور . بوسیرہدہ کر میان اوغلی ایلہ آرالرندہ برودت حاصل اولدینتی و بوکا سبب اولہرق کر میان اوغلی آغزندن قرامان اوغلنہ قیز ویرہ لی عثمان اوغلی دیارلریمزہ ال اوزاتدی ، سوزلرینی یازیور . شکاری بہ نظر آ علاء الدینک

بش اوغلی اولوب بونلردن محمد بك ايله اوغوز خان [۱] عثمان اوغلی قیزندن و دیگرلری یعنی پیر احمد و علی و قاسم بکیر دیگر بر حرمندن متولددر. علاءالدین حیائنده ولایاتی اولاد و افراسنه تقسیم ایدوب از جمله لارنده بی محمد بکه و نیکده بی علی بکه و یرمک کندوسیده قونیہ تختنده آراماز اولمشر. صاغلغنده اوغلی محمد بکه آل سلجوق نلندن کیخسروک حفیده زاده سی ختن بانوی [۲] آل هرق بوندن ابراهیم بك تولد ایتمشر. ینه شکاری نك روایتیه کوره علاءالدین بك سیواس سلطان قاضی برهان الدین [۳] و ارتنا اوغلیله وقوع بولان محاربه ده تنك ايله بوندن یارمه هرق آلدینی جریحه نك تأثیریه بووقعه دن بریجق سه صکره وفات ایدوب لارنده ده حصار قرینده غزا مالندن انشا ایتدیردیکی جامعک یاننده کی تربیه دفن اولمشر [۴].

شکاری نك روایاتندن صکره دیگر تاریخلرده عطف نظر ایده لم. منجم باشی جامع الدول و صحایف الاخبارده یمنشی بکک اوغلی علاءالدین بکه انجیق بریجق سطرلق سوز حصار ایتدکدن صکره یرنه قائم اولان اوغلی علی بکه دائر تطویل کلام ایدیور. شو کیفیندن طولانی دخی علاءالدین ايله

[۱] جامع الدولده مندرج شکاری نك مختصرنده (اورخان) یازیلیدر.

[۲] نیکده ده کیخسرو نالک کریمه سی خداوند خاتونک مدفون بولندی بی نك تاریخ ۷۱۲ در. محمد بکک تزوج ایلدیکی ختن بانو بلکه موی الیه لک حفیده سیدر. [۳] عزیز استرآبادی نك اثری اولان فارسی مناقب قاضی برهان الدین ده قرامان اوغللرینه دائر پک چوق معلومات واردر، ایاصوفیه کتبخانه سنده ال یازی نسخه ، نومرو ۳۴۶۵.

[۴] شکاری بومناسیته استانبول فتحنندن صکره قرامانه کلن کدک احمد پاشانک علاءالدینک لارنده ده یابدینی مسجدی سائر برچوق مبانی ايله برابر یقوب حصار بناسه خرج ایلدیکنی فقط علاءالدین تربیه نك الآن حصار قرینده موجود اولدانی و علاءالدینک اوراده مدفون بولندی بی علاء ایدیور. فی الواقع شکاری نك دیدیکی محله یرلور طرفندن علاءالدین تربیه سی ذیلن غایت مزین فقط بوکون خراب و متروک برتربه موجود اولوب اوزرنده هیچ بر تاریخی کتابة یوقدر.

علی نك عين شخص اولق لازم كلديكي آ كلاشيلور . علی بك سلطان مراد اوله مصاهرت پیدا ایتك ارزوننده بولنه رق پادشاهك کریمه محترمه سی تروج ایلشدر^[۱] . بواز دواجك ۷۸۳ تاریخنده وقوع بولدیقه دائر اولان ملاحظاتی بالاده بیان ایتش ایدك . انجق علاءالدینك پدری خلیل بك ۹ نومرولی كتابه موجبجه سنه مذکورده دهها برحیات اولدیقه نظراً علاءالدینك جلوسی البت بوتاریخدن صکره اولق لازم كلور .

سلطان مراد دامادینك کندونه مطیع قاله جقنی ظن ایدرکن بالعکس اعلان خصومت ایلدیکندن ۷۸۸ده قونییه حصارى اوکنده وقوع بولان وتاریخلرک برتفصیل بیان ایلدکری محاربهده علاءالدین بك مغلوب ایدیلش فقط زوجه سی سلطانك شفاعتدن طولای طرف پادشاهیدن حرمی عفو وینه مملکتك تصرفنه مساعدہ اولمشدر^[۲] .

مع مافیه علاءالدین بك برقاج کره لر نقض عهد ایلوب نهایت ییلدیرم یازید خانك جلوسندن صکره صورت قطیعهده تأدیى تیمور تاش پاشایه حواله اولمشله کرمان ولایتنده آق چای دیمکله معروف صحراده^[۳] ۷۹۳ سنه سنده وقوع بولان محاربه عظیمهده علاءالدین بك منهزم اوله رق اوغللری محمد وعلی بکرایله برلکده اسیر دوشمشلردر . بووقعیه متعاقب محمد بك بروسه زندانه حبس وعلاءالدین بکده پادشاهك امری صادر

[۱] فریدون بکده بوباده علی بکک تاریخ سبز مکتوبی واردور ، جلد ۱ ، صیفه ۱۰۲ - منجم باشی نك بوتاهل مسئله سندن طولای سہو ایلدیکنی بالاده یازمش ایدك .

[۲] نثری ، ولی الدین افندی کتب خاسنده ال یازیسی ، نومرو ۲۳۵۱ ، ورق ۶۲ - ۶۷ - نثری داتما علاءالدین نامی یازیور - تاج التواریخ ، جلد ۱ ، صیفه ۱۰۳ - ۱۰۸ - فریدون بک ، جلد ۱ ، صیفه ۱۰۸ .

[۳] بوموقی دهه تعیین ایتك لازمدر .

اولقسنزین تیمورتاش باشا طرفندن قتل ایدیلشد [۱] . اشته بوسورتله آقشهر و آقسرائی ولارنده کبی بلاد مهمه تسخیر و قونییه شهری دخی ضیمة ممالک عثمانیه قلنمشدر [۲] . بو حادثاندن صکره قرامان دولتی ایچون ۷۹۳ تاریخندن اعتباراً تیمور وقعه سنه قدر بر فاصله سلطنت حصوله کلدیکی قبول اولته بیلوب فی الحقیقه تاریخلرده بوزمان ظرفنده قرامان ممالکنه دائر هیج بر مهم وقعه به تصادف ایدیلور . بونکله برابر محمد بک برادر و عموجه لرله اولادی اوراده قالش و برر شهر و قلعه ده کندی باشلرینه حکومت سورمش اوله جقلری اغلب احتمالاتندردر . شکاری ده بوکا دائر هیج برسوز یوقدر .

ایکینجی محمد بن علاء الدین

دفعه اولی ۸۰۵ — ۸۲۲

دفعه ثانیه ۸۲۴ — ۸۲۷

کتابه ۱۰ (سنه ۸۱۲)

(۱) بسم الله والحمد لله وسلام على محمد رسول الله امر بعمارة هذه المدرسة المباركة (۲) في أيام دولة السلطان الاعظم شاهنشاه المعظم مالك رقاب الامم سلطان محمد بن علاء الدين خلد الله ملكه (۳) علاء الدنيا والدين اخوه على بن علاء الدين بن [خليل بن محمود بن قرامان في تاريخ سنة اثنا عشر وثمان مائة المصطفوية الحمد لله وحده]

نیکده ده آق مدرسه نك قیوسی بالاسنده کی کتابه در . مذکور بنا

[۱] تاج التواریخ بو وقعه نك سنه سی کوسترمیورایسه ده ۷۹۳ و قایبی ایچنده اولدینی اکلشیلور (جلد ۱ ، صفیه ۱۳۱) — جامع الدوله و تقوم التواریخ ده و غالب بکده ۷۹۳ و تشری ده (بالاده مذکور نسخه ده ، ورق ۹۲) ۷۹۴ و توحید بک . موزم قتالوغنده کذا ۷۹۴ سنه لری قید اولنمشدر خیر اله افندی (جلد ۵ ، صفیه ۴۲ و ۴۳) بو وقعه نك ۷۹۲ تاریخنده ظهور یافتنه اولدیننی و علاء الدین بوغازندن ایپ طاقارق اغاجه آصق صورتیه اتلاف ایدیلدیکنی علاوه ایدیور . برشمذیلک علاء الدینک تاریخ وفاتی اولورق ۷۹۳ سنه سی قبول ایتدک . [۲] قونییه نك صورت قطعه ده فتحی ۸۷۱ سنه سنده در .

محمد بکک زمان حکومتده برادری علاءالدین علی بک طرفدن انشا اولنشد. بو کتابده کوشه لی برانتزل ایله آردیفمز اوچنجی سطرک نصف اخیر یازیجه فرقلی اولدیقدن بالآخره دکشدریش اولدینی آکلاشیلور.

کتابه ۱۱ (سنه ۸۱۲)

(۱) آیت کریمه (۲) بنا و انشاء هذا الجامع المبارك في أيام دولة السلطان الاعظم شاهنشاه المعظم سلطان (۳) محمد بن علاءالدین خلدالله ملکه و ابد سلطنته العبد الفقير المعرف بذنوبه (۴) مرسل بن الحاج مصطفى اوصل الله اماله و درقه متناه في سنة اثني عشر و ثمانماية

قونیه ده حکومت قوناغی قربنده حاجی حسن جامعک محراب دیوارنده خارجاً موضوع اولان کتابه در [۱]. نشری قرامان اوغلی محمد بکک قرامرسل نامنده برقاضی عسکری اولدیقی و ۸۱۶ تاریخنده کی بروسه وقعه سندن صکره محمد بکک کندوسنی چلبی سلطان محمد ایله باریشدرمفی تکلیف ایلدیکنی فقط محمد بکک بونی قبول ایتمدیکنی سوبلیور [۲]. بلکه بوجامعک بانیسی عین ذاتدر .

کتابه ۱۲ (سنه ۸۲۱)

(۱) امر السلطان الاعظم والحقان المعظم صاحب الخيرات والحسنات السلطان محمد بن الامير السعيد الشهيد المرحوم المغفور علاءالدین بک ایدالله مملکته و تقبل خیراته (۲) بسمارة هذه الزاوية المطهرة المنسوبة الى قطب المشايخ والسالكين الشيخ ابی اسحاق ابرهیم شهریار الکازرونی تقدمه بفقرانه فی شهر ربیع الاول سنة احدى وعشرين و ثمانماية

[۱] بو کتابه ایله آتیده کی ۱۲ نومرولی کتابه موسیو لویترود طرفندن قونیه ، نام المانجه اثرنده (صحیفه ۸۰) نشر اولنشد .
[۲] بالاده مذکور نسخه ده ، ورق ۱۵۰ .

قونیہ ده علاء الدین تپہ سنک جهت غربیہ سنده واقع ابی اسحاق کارزوننی زاویہ سنک قبوسی بالاسنده کی کتابہ در .

کتابہ ۱۳ (سنہ ۸۲۴)

(۱) انشاء هذه البقعة فی ایام دولة السلطان محمد بن علاء الدین خلد الله مملکتہ صاحب الخیرات (۲) والحنات محمد بن الحاج خاصبک الخطیبی اعلى الله شأنه وجعلها دارالحفاظ سنة اربع وعشرين وثمانماية

قونیہ ده غازی علمشاه محلہ سنده واقع دارالحفاظک قبوسی بالاسنده موضوع کتابہ در [۱] .

بو کتابہ ده اسمی مندرج اولان دارالحفاظ بانیسی حاجی خاصبک زاده محمدک نامنه اوله رق قونیہ موزہ سنده مرمرہ محکوک ترکیه بروقیہ موجود ایسه ده یک بوزوق و تقصان اولدیفندن تامامله استفادہ قابل دکلدر . و ققیہ نک ابتداسی شویله در : « وقف اتدی محمد چلی حاجی خاصبک اوغلی ... » و نهایتہ طوغری ده شو عبارہ لر اوقونیور : « هرکم بون تبدیل اته شرطندن برن و ... تبدیلنه و تغییرنه سبب ایلنه الله تعالی لعنت ... » .

کتابہ ۱۴ (سنہ ؟ ۸۲۷)

(۱) فی ایام دولة السلطان محمد بن علاء (۲) الدین بن قرمان خلد الله مملکتہ وعزہ (۳) اه الموت — اطرافده : « هرکه استرعیش بنیاد ایلیه | کله بنده ککلنی شاد ایلیه | دیلرز بنده کلندن خیر ایلیه | حاجی خاصبک اوغلی یاد ایلیه »

قونیہ جوارنده واقع مرام ده خطیب اوغلی جامعک قبوسی بالاسنده کی

[۱] موسیو هوآر طرفندن اناتولینک عربجه کتابه لرینه دائر فرانسه جه اثرینک ۷۹ نجی صحیفه سنده وکذلک موسیو لویتوہ دک بالاده مذکور اثرینک ۸۱ نجی صحیفه سنده نشر اولمشدر .

کتابه اولوب هر نه قدر سنه سی محرر دکل ایسه آیده مندرج ابراهیم بکک ۸۲۷ هجری مخلی کتابه سنه کک شکلا کک عبارته مشابهندن طولانی محمد بکک صوک سنه عا ئد اولق لازم کلور .

محمد بکک نامنی حاوی اولان بالاده کی بش کتابه دن بشقه الیزده مومی الیهک تیمور لک ایله مشترک سکسیله قونیه ده ۸۱۱ و ۸۲۲ ده مضروب ایکی سکسی موجود اولوب [۱] بونلرده ایسه محمد بکک پدرینک اسمی (علاء الدین) حتی ۱۰ نومرولی کتابه ده محمدک برادری علی بکک اسمی صیره منده (بن علاء الدین بن خلیل بن محمود بن قره مان) دیه مصرحاً محرر بولندیقندن کندوسنک خلیل بکک حفیدی اولدینی دخی متبان اولیور . مذکور ۱۰ نومرولی کتابه نک علی بکه عا ئد اولان قسنی اشاغیده علی بکک کتابه لری میاننده تدقیق ایده جکز .

محمد بکک [۲] زمان سلطنتی ایچون شکاری ده شایان استفاده هیچ بر قیده تصادف ایدیلور . بومورخه کوره باباسی علاء الدین بکک وقوع وفاتیه یرینه محمد بکک جلوس ایدوب بونک زماننده تیمور حادثاتی ظهور یافته اولمش و هر نه قدر آیدین و صاروخان و منتشا و حمید و اشرف اوغللری تیموره التحاق ایتشلر ایسه ده قرامان اوغلی محمد بالعکس ارمانا که چکلمشدر [۳] . ییلدیرم بایزیدخانک وفاتندن صکره تیمور بروسه بی الوب مذکور بکلره ینه ولایتلرینی ویرمش و بوندن صکره قونیه به دخی کلش

[۱] توحید بکک، موزه قتالوغی، نومرو ۷۶۵ - ۷۶۸ و علاوه ۷۶۵ بوج .
[۲] عرب مورخلری (ناصر الدین محمد) دیورلر - خیر الله افندی فریدون بکده کی بر مکتوبه استناداً اوله جق (شمس الدین محمد) یازیور، جلد ۶، صفحه ۳۱ .
[۳] عزیز استرآبادی بالاده مذکور مناقب قاضی برهان الدین ده قرامان اوغلی امیر علاء الدین تیمورک حمایه سنی طلب ایدرک شامه توجی و قتنده اوغلی محمدی کوندره جکینی واکر عثمانلی مملکتته دخی توجه ایده جک اولورسه بالذات ملحق اوله جینی و تصرفنده بولان برقاق قلعه بی زاویه یا پوب درویشلر و مسافرلر و سائر کیدوب کلنلر ایچون تخصیص ایده جکینی و هر قلعه ده سفره حاضرلندیقنی مکتوبه تیموره عرض ایلدیکنی قید ایتشد .

ایسهده المهرق خراسانه عودت ایتشد. چلی سلطان محمد خان اول زمانده انطالیه یی محاصره ایدن محمد بکه قلمه دزدارینک حمله سیله طوب اصابت ایده رک هلاک اولشدر. محمد بکه وفاتنده ابراهیم و اسحاق و خلیل و علاء الدین نامنده درت اوغلی قالوب بونلردن ابراهیم بک مقام سلطته قعود ایلش اولدینی دخی شکاری نک جمله روایتلنددر.

علاء الدین بکه ۷۹۳ ده وقوع بولان کیفیت قتلی ایله اوغلی محمد بکه بروسهده عثمانلیلر طرفندن حبس ایلدیکنی و او تاریخن اعتباراً دولت قرامانیهده برافصله سلطنت ظهوره کلدیکنی بالاده حکایه ایتش ایدک. تیمورک اناتولی یی استیلا سندن صکره بروسهیه اعزام ایلدیکی حیدری امیرزا محمد سلطان قرامان اوغلی محمد بکی جیسدن خلاص ایدرک تیموره کوندرمش و تیمورده محمد بکه ممالک موروثه سنی اعاده ایلدیکندن تحتیه و طور مشدر [۱]. الیزده محمد بن علاء الدینک تیمور نامنه اکر دورده مضروب برسکه سی موجود اولدیقدن و اکر دور (یا خود فلک آباد) ایسه ۸۰۵ سنه سی شعبانک اون یدنجی کونی تیمور طرفندن ضبط ایلد. یکنندن بوشهرک تاریخ مذکورده طوغریجه قرامان اوغلی محمد بکه ویریلش اولسی اقتضا ایدر [۲].

ییلدیرم بایزید خانک ارتحالندن صکره اولادی بیتنده حدوث ایدن

[۱] تاج التواریخ. جلد ۱، صیفه ۱۹۰ — نظمی زاده نک ابن عربشاه ترجمه سی، ابراهیم مغرقه طبیبی، ورق ۷۸ — منجم باشی، جامع الدول — صحایف جلد ۳، صیفه ۲۷.

[۲] توحید بک، موزه قشالوغی، صیفه ۳۶۳ — اکر دوردن بشقه موزه قولکسیونلرنده لارندهده مضروب بر مشترک سکه موجود اولدینی کبی خصوصی بر قولکسیونده دخی قویهده مضروب بویه برسکه کورولشدر — ذاتاً تیمور کرک قرامان اوغلنه کرک سندوسنه تبعیت ایدن سائر اناتولی ملوکنه سکه و خطبه نک تیمور کورکان نامنه اولسنی امر ایلش ایدی. بالاده مذکور ابن عربشاه ترجمه سی.

محاربات اثناسنده قرمان اوغلی محمد بك همان شهزادكانك هربريله آیری آیری مناسباتده بولنش و بالخاصه محمد چلبیك جمله سنه غلبه ایده جكنی درك ایدرك برورطیه دوچار اولماق ایچون ممالككك نصفی تمليك ایتك شرطیله محمد چلبی به دخالت ایتكله بیلرنده نوعما براتفاق دخی حاصل اولمشدر^[۱].

قرمان اوغلی محمد بك برآراق توسیع ممالك ایتكك دخی موفق اوله رق ۸۱۴ ده کرمان مالمکی استیلا ایتدیکی و انجیق ۸۱۷ ده چلبی سلطان محمدك یاردیمله ممالك مذکورده دن چیقاریلدیکی کوتاهیله ده کرمان اوغلی یعقوب بكك طاشه حك ایتدیردیکی و قیه سندن اكلاشیلور^[۲]. برده خاقان مشار الهك ۸۱۶ ده متقلاً جالس سلطنت اولسنی متعاقب محمد بك بروسیه قدر كلوب شهری اوتوز درت کون قدر محاصره بيله ایتش و سوباشی حاجی عوض پاشانك مدافعات شدیدنه رغماً حصاری ضبط ایده مه مش ایه ده شهرك حصار خارجنده کی قسمی تخریب ایتش و حتی اورخان غازی جامنی دخی یاقشدر^[۳]. فقط بو اراق موسی چلبیك جنازه سی اورایه ورود ایتكله هر نه سیدن ایه محمد بك چکیلوب

[۱] نثری . بالاده مذکور نسخه ده ، ورق ۱۳۵ — تاج السوارخ ، جلد ۱ ، صیفه ۲۱۸ و ۲۱۹ و ۲۳۲ و ۲۳۵ و ۲۴۵ — صحایف ، جلد ۳ ، صیفه ۳۲۰ — خیراله افندی ، جلد ۶ ، صیفه ۳۱ — فریدون بك ، جلد ۱ ، صیفه ۱۴۲ و ۱۴۳ .

[۲] بومجموعه نك ۱ خزیران ۱۳۲۶ تاریخلی ۷ نومرولی جزؤنده (صحیفه ۱۱۶-۱۲۱) نشر ایلدیكم « آل کرمان کتابه لری » .

[۳] بروسیه ده اورخان غازی جامنك قیوسی بالاسنده بولنان بش سطرلق برکتابه و قایم مذکورده ایچون بر وثیقه مهمه اولدیقتن بورایه درجی مناسب کورولدی : (۱) امر هذه العمارة الشريفة (۲) سلطان الغزاة والمجاهدين اورخان بك بن (۳) عثمان بك طاب ثراها في سنة اربعين وسبعمائة و حرق ولد (۴) قرمان ثم امر الناظر وهو الوزير الكبير بايزيد پاشا باشارة (۵) السلطان بن السلطان سلطان محمد بن بايزيد خان خلد سلطنته في سنة عشرين وثمانماية .

کرماسی طریقیله مملکته کیتشد[۱] . مع مافیه ۸۱۷ و ۸۱۸ نه لرنده تکرار قرامان مغرلری آچیلوب بوایکنجی سفر ائاننده چلی سلطان محمدک انکوریده خسته لهنه سندن بالاستفاده بایزید پاشا جبرکین بر خدعه به توسل ایدرک محمد بک ایله مصطفی بکی اسیر ایتش و فقط پادشاه محمد بکی عفو و اطلاق ایدرکینه مملکته کوندرمشدر [۲] .

بوسه لردن اعتباراً مراد خان ثانی نیک جلوسنه قدر کذران ایدن مدت ظرفنده قرامان اوغللرینه دائر عثمانلی تاریخلرنده همان هیچ بر سوز اولمیدنی کبی الیزده بوزمانه عائد اولمق اوزره ۸۲۲ تاریخلی قونیه ده مضروب بر سکه ایله برده بالاده کوردیکمز ۸۲۱ و ۸۲۴ تاریخلی کتابة لردن بشقه بروشیقه یوقدر .

حالبوکه عرب مورخلری مدت مذکوره ایچون کرک قرامان اوغلی محمد بکه کرک بالموم قرامان مالکی احواله دائر بر جوق وقایع مهمه خبر ویرمکده اولدقلرندن مضبوطات مذکوره نیک خلاصه سی بروجه آتی درج اولندی [۳] .

[۱] نثری ، بالاده مذکور نسخه ده ، ورق ۱۴۸ الخ — تاج التواریخ ، جلد ۱ ، صیفه ۲۷۴ — خیر الله افندی ، جلد ۶ ، صیفه ۸۱ — جامع الدول . [۲] نثری ، ینه اوراده ، ورق ۱۵۱ — تاج التواریخ ، جلد ۱ ، صیفه ۲۷۷ - ۲۸۲ — وایل ، تاریخ خلفاده بووقمه یی عرب مورخلرینه عطفاً ۸۱۸ ده کوستریور (جلد ۵ ، صیفه ۱۳۶) — چلی سلطان محمدک قره قیونلی قره یوسفه بووقمه یی دائر کوندروب فریدون بکده (جلد ۱ ، صیفه ۱۵۲) مندرج اولان فتحنامه نیک تاریخی یوقدر فقط قره یوسفک جوابنه جواب اولدق کیدن مکتوب ۸۲۲ نه سی اوائل محرم تاریخی حاویدر .

[۳] عینی ، عقدالزمان فی تاریخ اهل الزمان (تاریخ عینی) ، ولی الدین افندی کتبخانه سنده الیازیسی ، جلد ۱۹ . نومرو ۲۳۹۶ — مقریزی ، کتاب السلوک لمعرفه دول الملوک ، فاتح کتبخانه سنده الیازیسی ، جلد ۹ ، نومرو ۴۳۸۹ — ابوالحسن ، النجوم الزاهرة فی ملوک مصر والقاهرة ، آيا صوفیه کتبخانه سنده الیازیسی ، جلد ۶ ، نومرو ۳۴۹۴ — ابن حجر . انباء الفهر بابناء العمر . نور عثمانیه کتبخانه سنده الیازیسی ، نومرو ۳۰۵۶ — اشبو مورخلرک مضبوطاتی

قرامان اوغلی محمد بک عثمانلیلر ایله اولان مخاصباتی اثناسندہ مصر
سلطانی بولنان ملوک چرا کسہدن المؤید شیخہ بر جمیلہ اولیق اوزرہ
مصرک متبوعیتی بالقبول سلطانک نامہ سکضرب ایتدیرمش [۱] و ۸۲۰
سنہ سندہ سلطانک نامہ خطبہ دخی اوقوتدینتی کندوسنہ اعلام ایش
ایدی . فقط سلطان مؤید شیخ بونکله اکتفا ایتیوب محمد بک رمضان
اوغلرندن آلوب بالآخرہ ینہ رمضان اوغلرینہ کچن طرسوس شہرینک
دخی کندوسنہ تسلیتی مصرأ طلب ایتیش ایسہ سلطانک بوطلبی اجرا
اولندیقندن طرسوس حربأ ضبط ایدیلہرک مصر حکومتی طرفندن
اورایہ بردہ والی نصب اولنش ایدی . اشته بونک اوزرینہ قرامان اوغلی
محمد بک رمضان اوغلی ابراہیم بک ایله عقد اتفاق ایدرک ۸۲۱ سنہ سی
اوائلدہ مشترکاً طرسوسک محاصرہ نہ قویولدیلر . اثنای محاصرہ مدہ محمد
بک ختہلدیقندن اوغلی مصطفی بکی براقہرق کندی چکلش وسنہ
مزبورہ رمضان سندہ طرسوس مصر لیلرک الندن ضبط اولمشدر . همان
عین زماندہ دخی مصر حکومتک البستان والیسی اولان ذوالقدر اوغلی
علی بک برادری محمد بکک هجوم وتضیقنہ تحمل ایدہ میہرک حلبہ فرارہ
مجبور اولدینتی کچی قرامان اوغلی علی بکدہ برادری محمد بکک بوزوشہرق
تظلم حال ضمتندہ مصرہ قاچوب سلطان مؤیدہ التجا ایتیش ایدی .

اشبو داعی اندیشہ احوالدن طولایی سلطان مؤید شیخ اناطولیہ
قارشو بر حرکت عسکریہ اجرا سنہ لزوم قطعی کوردیکندن کندی اوغلی

بینندہ بعض فرقلر موجود ایسہ بورادہ انلری آیری آیری کوسترمک قابل دکلدر .
موضوع بحث اولان زمان ایچون عینی تاریخندہ بک چوق تفصیلات مندرجدر . — منجم
باشی جامع الدول وصحایفدہ وقایع مذکورہ ختندہ بک جزئی معلومات وریبور .
— وایل ، المناجمہ تاریخ خلفاسندہ (جلد ۵ ، صفحہ ۱۳۶ - ۱۴۸ ، مغریزی
وابوالحسن و ابن حجرہ مراجعت ایلشدر — وان برخم ، قورپوس ، قسم ۱
(قاهرہ) ، صفحہ ۶۸۸ ، نوط ۲ .

[] بوسکہ لردن شیمدی بہ قدر هیچ بردانہ کوردہ مدک .

وولی عهدی اولان صارم الدین ابراهیمی سردار تمین ایدرک معیتده امیر ططر و سائر بعض امرا دخی بولتدینی حالده مرتب براردو ایله ۸۲۲ سی محرمده مصردن یوله چیقارمشدر. اردوی مذکور رسیع الاخرک اوائلنده قیصریه پیشگاهنه مواصلت ایدوب اوراده قرامان اوغلنک والیسی بولتان شیخ چلیک قراری اوزرینه شهری و قلعہ سنن ضبط و ذوالقدر اوغلی محمد مصر طرفدن قیصریه والیسی نصب ایدیلش و سلطانک نامه خطبه و سکه ترتیب و ضرب اولتدینی کچی قلعہ قبولرندن برینه ده سلطانک اسنه برکتبه حک ایتدیرلشدر [۱].

مصر سرداری ابراهیم قیصریه دن قونیه جهته طوغری حرکتله [۲] اولانیکده یه اوغرایوب یکریمی بدی کون محاصره دن سکره بورای ضبط ایدرک ارکلی یه و اورادنده جهادی الاخرک صوکلرینه طوغری لارنده یه مواصلت ایتشدر. یوقصبه نک دخی ضبط اولنمی اوزرینه قرامان اوغلی محمد بک طاش ایل طاغلرینه فرار ایتش وهرنه قدر امیر ططر طرفدن تعقیب ایدیلش ایسه ده کندوسی الد ایدیله میوب فقط قاراکاهی کشف اولتدیشدن بک چوق اموالی اغتنام ایدیلشدر.

اشته بونک اوزرینه قرامان اوغلی محمد بکک برادری علی بک قرامان محالکنه مصر طرفدن والی نصب اولنوب بالجمله قرامان بلادنده سلطان مؤیدک نامه خطبه قرائت و سکه ضرب ایتدیرمشدر. بومظفریت عظیمه دن سکره سردار ابراهیم مصر اردوسیه قرامانی

[۱] قیصریه قلعہ سنده بویه برکتبه کورمک. فقط قصبه مذکورده برمدسه نک قبوسنده ذوالقدر اوغلی محمد بکک نامه ۸۳۵ تاریخلی برکتبه موجوددر.

[۲] یالکزابوالمحسن ایله مقریری قونیه طرفنه متوجه اولدقلمی بیلدیریورلو. عینی ده ایسه بویه بر-وزاویوب فقط سردار ابراهیم طرفدن فتح اولتان قیصریه ونیکده ولارنده شهرلری میاننده قونیه بی دخی تمدا ایتنه باقبورسه تکمیل قرامان محالکنک بوارالی مصره تابع اولدینی اکلاشلیور.

ترك ايدرك ۸۲۲ سنه‌سی رچينك اوانلنده حلبه عودت ايتمشدر. مع مافیه عين زمانده مصرك شام والیسی اولان تنبك ميق برابرنده اولجه مصره التجا ایدن رمضان اوغلی حمزه بك دخی بولندينی حالده قرامان اوغلی محمد بك زاده مصطفى ایله رمضان اوغلی ابراهيم بکی اطنه جوارنده تضيق ومنهزم ايدرك هم اطنه‌نی وهم طرسوسی تکرار استرداد ايتمشدر. بووقه‌نی متعاقب قرامان اوغلی محمد بك و اوغلی مصطفى بك ینه متفقلری بولان رمضان اوغلی ابراهيم بك ایله برلكده قیصریه‌نی آلتی اوزره اورایه کیتشلر ایدی. سنه مذکوره شبانك اونالتیجی کونی مصرك قیصریه والیسی اولان ذوالقدر اوغلی محمد بك بونلره قارشو چیه‌رق قیصریه جوارنده بیلرلنده وقوع بولان محاربه شیدیده متفقلر اردوسی کلیا بریشان اولدقدن بشقه قرامان اوغلی مصطفى بك مقتول اولش و بئدی محمد بك دخی اسیر دوشمشدر [۱]. مصطفى بلك سر مقطوعی قاهریه ارسال اولنديقتن رمضانك اون بشتیجی کونی اورایه مواصلته قلمه قیوسنه تملیق ایدیلشدر. ذی الحجه‌نك یکریمی یدنجی کونی دخی قرامان اوغلی محمد بك زنجیر ایله باغلی اولدینی حالده قاهریه کتوریلوب امیر مقبل الدوادارک خانه ایندیریلشدر [۲]. محمد بك ۸۲۳ سنه‌سی محرمك ایکینده باغلی اولدینی حالده بر دیوان عالی‌ده سلطان مؤیدك حضورینه چیقاریلوب طرسوسه تعرضدن و کندی مالکی اهاالینه ایندیکی ظلم وغدردن طولانی سلطان طرفندن تکدیر و قییح ایدلدکن صکره قلمه برجلرندن برینه حبس ایدیلوب سلطان مؤیدك ۸۲۴ سنه‌سی محرمك

[۱] عینی تاریخنده محمد بك اسیر دوشدیکی وقت تخیلی ضتنده ذوالقدر اوغلی محمد بکه کلی مقدار رشوت تکلیف ایندیکی وانجی سلطان مؤیددن قورقدیقتن طولانی قبول ایدمبوب قرامان اوغلی کرهأ مصره کوندردیکی مندرجدر.

[۲] عرب تاریخلرندن بعضلری مصطفى بلك سر مقطوعیه برابر محمد بك مره کوندریله یکنی سوبلورلر.

اوائلده وقوع بولان وئاقته قدر قلمده قالمشدر . آنجق امیر ططر مصر تخته جلوس ایدنجه محمد بکی سنه مذکوره محرمک بکرمی بشده جیدن اطلاق ایله اولا فخرالدین نامنده برامیرک خانه منه نقل ایتدیرمش وشهر صفرده دخی مملکته عوده رخصت ویرمشدر . بریه الشامده آسایشک فقدانندن طولایی ورده اسکندریه یی کورمک آرزوسيله محمد بک بجزراً مملکتی جانبه عزیزیتی ترجیح ایتدیکندن امیر ططر کندونه مصارف راهیه وبرچوق اشیا وحی سلطان مؤیدک چادرلرندن بری دخی احسان ایدرک یوله چیقارمشدر . اثنای راهده مخالفت هودان طولایی محمد بک قبریسه دخی اوغرادقدن صکره قرامانه مواصلت یتمشدر .

اشته عرب مورخلرینک مضبوطاتی خلاصه یوندن عبارتدر . عثمانلی تاربخلرینک بومدت ظرفنده قرامان اوغللرینه دائره ییچ بر خبری محتوی بولنامسک اسبابی آتق الیان وقایعک کاملاً مصر طرفه منحصر قالمش اولسيله آکلشیلور . محمد بکک قرامانه مواصلتی متعاقب تخته تکرار جلوس ایش اوله جنی ۸۲۴ سنه سی حاوی اولان ۱۳ نومرولی کتابه ایله مثبت اولدیفندن محمد بکک بر سنه وبش آی قدر امتداد ایدن اسارتی ائساننده دولت قرامانیده بر فاصله سلطنتدهاوقوعه کلش اولدینی تحقیق ایدر .

محمد بک سلطان مراد ثانی نك اوائل سلطنتده از میر اوغلی جنید بک وتکه اوغلی عثمان چلبی ایله بعض مناسباتده بولنوب حتی اولجه عثمانلیرک اله کچمش اولان انطالیه حصارینک محاصره سی ایچون تکه اوغلیله بر اتفاق دخی عقد ایش ایدی . آنجق قرامان اوغلی محل مذکوره مواصلت ایتزدن اول انطالیه محافظی فیروز بک زاده حمزه بک بقت عثمان چلبی نك قرارگاهنی باصرق عکرنی پریشان وکندوسنی اتلاف ایتمشدر . بونک اوزرینه اولجه کیردیکی بونجه فلاکتلری در خاطر ایتمین

محمد بك كرك متففقك انتقامنى آلىق كركه انطاليه قلمه سنى الدہ ايتك
 هوسيله قلمه مذکورہ يى محاصرہ يہ جرأت ايتش ايسہدہ چوق كچمہ دن
 قلمہ دن آتيلان برطوب كلہسى كندوسہ اصابت ايدرك وجودي خردہ خاش
 ايتشدرد. بو وقہ مؤلہدہ محمد بك اكبر اولادى اولان ابراهيم بك ايلہ
 ديكر اوغلى على بك دخی حاضر ايديلر على بك همان عثمانيلرہ دخالت
 ايتديكندن بك چوق التفات شاهانہ يہ نائل اولدقدن بشقہ كندوسہ
 همشيرہ لرندن بريخي دخی تزويج ايدرك مصاهرہ قبول اولمش وصوفہ
 سنجاني توجہ قلمشدرد^[۱]. ابراهيم بك ايسہ باباسنك جنازہ سنى الہرق
 فرار ايتشدرد^[۲].

اشبو انطاليہ وقہ سنك تاريخ وقوى حقندہ مورخلر ۸۲۵ ايلہ
 ۸۳۰ سنہ سنى ارانسدہ اختلاف ايدينيورلر^[۳]. فقط اليزدہ محمد

[۱] شكارى بوغلى بكہ علاء الدين نامى و يروب عثمانى مؤرخلرنك روايتہ
 مخالف اولهرق ابراهيم بك كندوسنى مكرراً سردار اولهرق اودو ايلہ كرمانيلرہ
 و عثمانيلرہ قارشى كوندرديكنى وحتى ابراهيم بك حكومتك نہایتلرہ طوغرى
 عثمانيلر ايلہ اولان بر عاربہدہ مذکور على بك مقول دوشديكى سويليور .
 [۲] نثرى ، بالادہ مذکور نسخہدہ (ورق ۱۶۸) قرمانيلرك محمد بك
 وجودى پارچہ لرني طوبلايوب بر صندوق درونشدہ قرمانہ كوندردكلرنى و محمد
 بك تلفنہ سبب اولان طوبك انطاليہ قلمہ سنى قبوسندہ زنجير ايلہ اصيلدينى
 سويليور — تاج التواريخ ، جلد ۱ ، صيفہ ۳۲۹ - ۳۳۱ .

[۳] جنايہدہ ۸۲۵ — تقويم التواريخدہ ، ۸۲۵ ، — هوار ، بالادہ
 مذکور اثرندہ ، صيفہ ۷۲ ، ۸۲۵ — عيني . بالادہ مذکور نسخہدہ (جلد
 ۱۹ ، ورق ۲۷۲ و ۲۷۳) ۸۲۶ سنہ سنى — وائل ، تاريخ خلفادہ ، جلد ۵ .
 صيفہ ۱۹۷ ، عرب مورخلرنہ عطفاً ، شہر صفر ۸۲۶ — نثرى وادريس دہ ،
 ۸۳۰ — تاج التواريخ دخی ۸۳۰ سنہ سنى كوستروب (جلد ۱ ، صيفہ ۳۳۲)
 انجمنى بعض تركى تاريخلردہ مراد ثانی لك اوائل سلطنتندہ دوزمہ مصطفي و كوجك مصطفي
 وقايبى ارانسدہ اولهرق مذکور بولندينى علاوہ ايدنيوركہ بوجالہ ۸۲۵ ياخود
 ۸۲۶ سہ لرندہ اولق لازم كلور — غالب بك و توحيد بك مسكوكات قتالوغلرندہ
 ابراهيم بك برسكہ سنك تاريختہ عطفاً ۸۲۹ سنہ سنى قبول ايدنيورلر — بوبادہ وان
 برخك بالادہ مذکور اثرينك ۱۲۸ نجى صيفہ سنہ ۲ نجى نوطہ دخی مراجعت ايديكز .

بکک خلقي اولان ابراهيم بکک ۸۲۷ تاريخلى برکتابى موجود بولديفندن حادثه مذکورده نك مطلق بوسنه ياخود بوندن اول وقوعه ککش اولمى اقتضا ايدر .

ييلديرم بايزيدخان زماننده پدرى قرامان اوغلى علاءالدين بکک قتلتي متعاقب عثمانلير طرفندن اسير ايديلهرك اون سندن زياده بروسه محببده ياندقدن صکره ۸۱۸ ده چلبى سلطان محمد طرفندن دخى اسير ايديلن و مؤخرأ مصرک حمايه سنى قبول ايله استقلاليتنى بيله فدا ايتمکه راضى اولان و بر قاج سنه متبادياً مصرلير ايله اوغراشديني حالده ينه مملکتده پايدار اولميه رق اوچنجى دفعه اولقى اوزره دشمن اليه دوشن فقط سائقه قدر ياخود حرص جاه ايله ينه کلوب اوچ سنه قدر تحت نشين اولميه بيلن بو بد بخت محمد بک نهايت بويله فجيع بر صورتده ترك دغدغه حيات ايتمشدر . مورخ عيني محمد بکک سخی النفس وغايت متدين اولديفندن بحث ايله بعضى تاييشتنده بولنيور^(۱) . محمد بکک لارنده ده دفن اولنديفنى شکاری يازييور ايسه ده قبرينک على معلوم دکلدري .

على بن علاءالدين

کتابه ۱۵ (سنه ۸۱۲)

.... الحام على بن علاءالدين سنه اثنى وعشر وثمانماية

نيکده ده آق مدرسه وقفندن اولان حامک قپوسى بالاسنده کى کتابه اولوب ابتداسى نقصاندر .

کتابه ۱۶ (سنه ۸۱۶)

(۱) عمر هذا المسجد في أيام السلطان (۲) على بن علاءالدين الحام محمود سنه ست عشر وثمانماية

[۱] بالاده مذکور نسخه ده ، جلد ۱۹ ، ورق ۲۷۳ .

نیکدہدہ شاہ مجدی نامیہ معروف اولان مسجدک قپوسی
بالاسندہ کی کتابہ در .

کتابہ ۱۷ (سنہ ۸۲۴)

(۱) برسم اقرالاشرفی العالی الملائ ابن قرمان اعز الله انصاره (۲)
عمارة الحاج . . تاریخ سنہ اربع عشرین وثمان مایہ

نیکدہدہ اسکيجيلر چشمه نك دیوارندہ موضوع اولوب قبا یرہ
کومولشدر . صاحب خیراتک اسمی بوزوقدر .

کرك محمد بکک کتابہ لری صیرہ سندہ قید اولسان ۱۰ نومرولی
کتابہدہ کرك بالادہ کی ۱۵ و ۱۶ نومرولی کتابہ لردہ بلاشک وشبه
علاءالدین بکک اوغلی اولان علی بکک نامی مندرجدر . حتی ۱۰ نومرولی
کتابہدہ کندوسنک محمد بکک برادری وخیل بکک طورونی اولدینفی
دخی مصرحاً یازیلی اولدیفندن علی بکک شخصی دخی تعین ایتمش اولبور .
کتابہ مذکورہدہ اوچنجی سطرک ابتدائندہ علاءالدین والدین اخوہ
علی الخ ، ترکیبی محرر اولسندن طولایی تردده حاجت اولیوب یونک
« اخوہ علاءالدین والدین علی » صورتده قرائت اولتمق لازم کلدیکنه
ومحمد بکک برادری اولان بو ذاتک اسمی (علاءالدین علی) اولدیفنه
قناعت حاصل ایدہ بیلورز . ۱۷ نجی کتابہ نك طرز تحریری مصر
کتابہ لریته مشابہ اولوب فی الواقع علی بکک ۸۲۴ سنہ سی اوائلندہ دها
مصرہ تابع وعادتا مصرک قرماندہ بروالیسی اولدینفی بالادہ ذکر ایتمش
ایدک . متن کتابہدہ کی « الملائ ابن قرمان » عبارہ سی مطلق قرمان
اوغلی علی بکک اشارتدر .

(مابعدی وار)

خلیل ادهم